

蒲坂楊太宰獻納稿卷之四

議原任刑部尚書顏頤壽等贈官疏

少傅兼太子太傅吏部尚書臣楊博等謹

題為



開讀事驗封清史司案呈奉本部送吏科抄出巡撫湖廣
等處地方兼贊理軍務都察院右僉都御史楊豫孫
題奉

聖旨該部知道欽此欽遵抄送到司行在文選考功二司
各付稱查得刑部尚書顏頤壽於嘉靖六年九月內
以議大獄冠帶閑住原任貴州按察司副使蔣信於

嘉靖二十二年九月內為患病回籍革職為民近已
病故浙江道監察御史石金福建道監察御史喻希
禮先年俱以建言克軍為民通查案呈到部看得原
任刑部尚書顏頤壽歷官端謹持法嚴明力辯諸冤
而利害不辭身親二木而詞色更厲權姦因而消阻
紳佩得所師程御史石金喻希禮同切輸忠均能敢
諫一以議大禮而謫戍邀方一以止醮祠而編列氓
庶雖當擯斥之後益敦廉靖之風副使蔣信志存經
濟學有淵源歷宦四方士庶誦廉平之政居家共載
鄉閭賴型範之功既經撫按官會舉前來相應議擬

合無將顏頤壽石金喻希禮俱先復其原職仍各量
贈一官蔣信固非建言德望交孚似應復其副使之
職臣等未敢擅便隆慶元年七月二十九日題奉

聖旨是顏頤壽石金喻希禮贈官俱依擬蔣信准復原職
欽此

計開

原任刑部尚書顏頤壽擬贈太子少保

原任浙江道監察御史石金擬贈光祿寺少卿

原任福建道監察御史喻希禮擬贈光祿寺少卿

原任貴州按察司提學副使為民蔣信今復原職

覆給事中張應治等論尚書朱衡降俸疏

題為漕渠壅決異常乞

賜究治欺誤大臣亟圖善後以濟

國儲以拯民患事考功清吏司案呈奉本部送吏科抄
出南京工科等科署科事南京戶科給事中張應治
等奏又該吏科左給事中陳瓚題為懇乞

聖明申道治水大臣以重

國命事俱奉

聖旨吏部知道欽此欽遵通抄送司案呈到部看得南京
戶科等科給事中張應治等論劾總理河道工部尚

書朱衡治河失宜以致漂沒船糧乞要亟議黜罰或
降級管理吏科左給事中陳瓚乞要將工部尚書雷
禮代管河道朱衡姑從降罰佐禮共計各一節臣等
備查運道事宜朱衡新河之開不為失策但其報完
未幾衝潰卽至總理踈略之罪豈惟南北二科交章
言之卽衡自分亦自難辭至於雷禮近日三疏乞休
溫旨懇留正為都城諸工方在經營且部政四方之事河
道一方之事令禮代管臣等不敢輕議合無將朱衡
先行降俸容令照舊供職務要查照各官奏內事理
會同彼處撫按官虛心經理毋為目前草率之圖務

成日後永久之計隆慶元年七月二十九日題奉

聖旨是朱衡降俸一級着用心經理河工以圖後效欽此

覆監察御史方新條陳寬考察疏

題為披瀝愚忠敷陳時弊懇乞

聖明亟處以正人心以培

國脈事考功清吏司案呈奉本部送准禮部咨禮科抄
出江西道監察御史方新題奉

聖旨該部知道欽此欽遵咨部送司案呈到部看得江西
道監察御史方新條陳前因大率謂三年考課吏部
有常例矣復有年終考察之條差完舉劾御史有定

規矣復有不時論劾之令綜核嚴急一節為照

朝廷之飭吏治固貴明作尤先敦大御史方新因事敷
陳無非欲求寬嚴適中之意但歲終原無考察之事
止是近日御史凌儒欲要專考歲貢教職蓋以此輩
提問論劾俱所不及士風學政均有關係以故本部
題奉

欽依止許論其甚者拔其尤者舉刺並行原未槩考乎庶
官計處已詳難以別議合無斟酌所擬部院遇考察
之期撫按當回奏之日各要秉心惟公叅訂以恕三
年考課主于黜幽不必取盈於舊數差完論劾務求

實跡不宜偏聽乎風聞果有貪酷顯著難以一日容
留者許撫按不時論劾其餘止宜照常施行至於械
繫之辱乃所待奸惡者必須奉

旨拿問提問者方可如法懲治庶幾甄別之智愛惜之仁
兩得之矣隆慶元年七月二十九日題奉

聖旨是欽此

覆都給事中王治奏尚書趙大佑聽其終養疏

題爲陳末議酌去留以愛惜鉅材仰贊

治化事考功清吏司案呈奉本部送吏科抄出吏科都給
事中王治題奉

聖旨吏部看了來說欽此欽遵抄出送司案呈到部看得
吏科都給事中王治具題前因大率謂禮部尚書高
儀南京兵部尚書趙大佑當分別去留在儀則慎乎
其去使及時以宣力在大佑則善乎其去使優閒以
保終仍

諭諸大臣盡心職業毋便身圖各一節除高儀才富經綸
心懷忠亮偶病乞休情非得已見已痊可供職無容
別議外所據趙大佑近日推用出自科道官張鹵等
交章會薦但本官向來家居名雖養病實因親老卽
今父母年俱八袞絕裾而出殊非人子之情該科欲

要深亮其心曲全其孝委於士風世教有益合無依其所擬將趙大佑准其終養親終之日另行錄敘及照兩京部院卿寺諸臣或以考黜或以劾罷數月之間不下二三十人一時推補資既多不相應不得不取於望然揆以循名責實之義真有未盡今後起廢之人未到任者止許別轉一次到任之後立有成績方議再擢若有孤忠大節才德出衆者不次超遷弗在此限其見任各官不拘大小但以不職見刺者亦容臣等無憚異同無事依違查其人品官常果無玷缺雖被重劾在所必留查其人品官常果有玷缺雖

以微罪在所必去方如科議類若錫環不若慎於賜珖之意且人才譬之材木摧折甚易長養甚難不為愛惜一有緩急難免乏才之患臣等職司所在不敢不深長慮也均乞

聖裁隆慶元年八月初二日題奉

聖旨是趙大佑准終養員缺卽推補欽此

議原任總督劉遜右都御史王忬復職疏

題為懇乞

大恩俯念先臣微功極寃

特賜昭雪以明德意以伸公論事驗封清吏司案呈奉本

部送准都察院咨據巡按直隸監察御史郝杰呈查
勘過原任總督薊遼保定等處軍務兼理糧餉都察
院右都御史兼兵部左侍郎今處決王忬功罪緣由
及稱王忬被虜入犯真滴難辭歷任邊方勞亦難泯
刑部原擬充軍顯戮驟加不無可憫權奸用事諒必
有由各一節為照地方失守總兵法該重典總督官
調度失宜止該為民情極重者不過充軍所據右都
御史王忬既經巡按御史郝杰查勘明白陰受權奸
之害明收倭虜之功死非其罪公論共情合無將本
官復其原職以示昭雪係干

恩命臣等未敢定擬隆慶元年八月初二日題奉

聖旨王忬准復原職欽此

覆右給事中陸鳳儀條陳行久任慎考察疏

題為乞重遷博慎考察以裨吏治事文選清吏司案呈
奉本部送吏科抄出吏科右給事中陸鳳儀題奉

聖旨吏部知道欽此欽遵抄出送司案呈到部臣等有得
吏科右給事中陸鳳儀具題前因大率二事其一謂
久任當行其二謂考察當謹論議剴切深於吏治有
益查得先年諸臣悉皆久任卽如胡濙任禮部尚書
二十餘年周忱任應天巡撫一十八年況鍾任蘇州

府知府十年在內則成寅亮之功在外則著阜成之績炳炳烺烺真可觀采蓋因彼時進者甚難退者甚少以故銓曹久任若無窒碍嘉靖四十五年以前姑未暇論隆慶改元以來方及數月部院卿寺大臣或以考黜或以論罷不下二三十人若非

聖皇新政廣搜巖穴雖欲東遷西轉南旋北移亦不可得臣等職司其事蚤夜圖維深切憂惶大抵必欲行久任之法先當定考察之制譬之材木斧斤不伐牛羊不收然後可以收棟梁榱桷之用合無斟酌本官所擬今次外官考察容臣等部院虚心評騭如曰貪必

求其贓証之實如曰酷必求其暴虐之實如曰不謹必求其恣肆之實如曰不及必求其庸劣之實撫按之言得之目擊者則以為張本藩臬之言得之面質者則以為參考或方岳一省全無不必過必搜索庶官一省人少不必取盈舊數寧使不肖者遺之以俟後考無寧使賢者黜之以枉前功本部一面仍將各處撫按舉到地方人才每三五省類本議覆果有可用者請自

上裁遇有員缺與先經起用者酌量推補少俟羣才畢收之時然後將久任之政斷然行之以成

雍熙之治蓋天下之治忽係於人才人才之盛衰關乎吏治所以調停劑量使之濟濟不乏者全在我

皇上一加之意而已伏乞俯賜裁定

敕下遵行隆慶元年八月初九日題奉

聖旨是欽此

再議建言得罪少卿馬從謙等贈官疏

題為申明

新詔以廣

聖恩以昭大信事驗封清吏司案呈奉本部送先該原任光祿寺少卿兼翰林院五經博士充軍馬從謙男馬

有驪原任戶部江西司員外郎杖死申良男申去佞原任右春坊右清紀郎兼翰林院侍書為民周鈇男周雲程原任刑科右給事中充軍張達男張翊元原任戶科給事中充軍常泰男常洲各遵

詔奏乞伊父卹錄緣由到部該本部看得馬從謙等各悞自獻之忠咸負敢言之氣建白雖有不同彼罪均為可憫查擬馬從謙申良各贈太常寺少卿周鈇常泰各贈光祿寺少卿題奉

聖旨是欽此伏覩

新詔內一款自正德十六年四月以後嘉靖四十五年十

二月以前建言得罪諸臣遵奉

遺詔存者召用歿者卹錄欽此節該本部分別三等第一等者復職贈廕仍加

諭祭二等者復職贈廕三等者復職贈官其中如大理寺少卿徐文華原以議獄得罪擬贈僉都御史翰林院修撰楊慎原以議禮得罪左春坊贊善羅洪先御史楊爵員外郎楊繼盛俱以建言時政得罪各議贈光祿寺少卿俱奉

聖旨依擬欽此今少卿等官馬從謙等建言之心被罪之慘與徐文華等大略相同茲獨不蒙准贈

聖澤未周似為缺典等因案呈到部看得自正德十六年四月以後建言得罪諸臣在

先帝升遐遺詔既倦倦於解網之仁在

皇上登極新詔復切切於澤骨之政卽如少卿徐文華修撰楊慎贊善羅洪先御史楊爵員外郎楊繼盛等或贈其官或錄其後或賜謚以表其行或給葬以安其魄海內之人傳誦

聖德真如天覆地載至不容口乃今獨於少卿馬從謙員外郎申良給事中張逵常泰清紀郎周鈇五臣應得恩典不蒙准允臣等反覆思之不得其故夫馬從謙以抗

疏申良以大禮俱死於杖下張遼常泰以大獄俱死於遐荒周欽以屢上封事死於林壑孤忠勁節較之徐文華等事本相同錄卹之

恩一旦懸絕至此非惟改元新詔不信於天下卽

先帝解網之仁有所及亦有所不及矣自昔式閭表墓非為死者激勸攸關實為生者事有似緩而實於急者臣等以為此舉是也伏望

聖明特賜采覽備從臣等原議仍將馬從謙等各贈一官則汪濊之恩遍於枯朽

綸音之布堅如金石矣臣等無任屏營懸切之至隆慶元

年八月初九日題奉

聖旨已有旨了罷欽此

覆給事中莊國禎劾尙書郭宗臯等畱用疏

題為憤事罪臣不堪再用懇乞軫念南都要地速

賜罷斥以慎舉措以重根本事考功清吏司案呈奉本部

送吏科抄出戶科給事中莊國禎題奉

聖旨吏部知道欽此欽遵抄出送司案呈到部看得戶科

給事中莊國禎論劾新推叅贊機務南京兵部尙書

郭宗臯總督南京糧儲都察院右僉都御史游震得

各衰庸不堪乞要罷斥別推才望以充其任一節為

照郭宗臯爲御史時抗疏直諫爲總督時得罪權貴
兩次

廷杖二百死而復蘇謫戍靖虜二十餘年辛苦備嘗機
宜深諳大同之事止是零寇入境原非大舉巡按御
史胡宗憲適在地方立逼總兵官張達副總兵林椿
先帶家丁出城拒敵大軍未至爲賊掩襲大同相去
軍門二百餘里比及報至賊已回矣宗憲自知罪狀
不敢參論督撫惟爲總兵奏討卹典雖經給事中唐
禹風聞遙論不過以其職任相關固未嘗言及拿問
廷杖謫戍也歲月旣深知者甚少頃者南京兵部尙書

員缺臣等會集三品以上官虛心評議咸謂薊遼宜
大陝西三邊總督見奉

欽依不許遷轉南京軍情未定必須就近推用方不悞事
彼中雖有尙書劉采吳嶽與郭宗臯俱係新任俱年
六十之上就中論之諸練邊務則宗臯爲最且先該
戶兵二部特薦臣等故首推之游震得久在諫垣卓
有風猷巡撫福建不幸繼王詢阮鶚貪肆之後兵食
俱匱人心解體釀成興化之變追論其罪當在詢鶚
不當在於震得先以南京總督糧儲員缺會議得震
得雖有興化之失乃甲兵之事總督糧儲乃錢穀之

事才當器使人難求備且近該南京科道會舉以故
 臣等亦首推之今據該科論列前因蓋以南都根本
 重地兵食二事並為緊要無非為官擇人之意但人
 惟求舊新者不如舊者之練昔人有言使臣捕虎逐
 鹿則誠老矣使策國事則尚少叅贊總督之臣均為
 策國事者即使七十之年精力未衰倘當留用況二
 臣本至引年之時乎伏望

聖明特賜電察將二臣仍令用心供職以責後效但大臣
 去留出自

朝廷臣等未敢定擬隆慶元年八月十五日題奉

聖旨郭宗臯游震得既精力未衰都准留用兵糧事重著
 各上緊到任供職不得因被論自沮陳詞引避以致悞
 事欽此

議原任南京兵部尚書王軌復職疏

題為

開讀學驗封清吏司案呈奉本部送吏科抄出總督漕運
 兼提督軍務巡撫鳳陽等處地方兵部左侍郎兼都
 察院右僉都御史張瀚巡按直隸監察御史孫丕揚
 題俱奉

聖旨吏部知道欽此欽遵抄出送司案呈到部看得總督

漕運兼提督軍務巡撫鳳陽等處地方兵部左侍郎兼都察院右僉都御史張瀚等會題要將侍郎曾銑名下原坐贓銀免追尚書王軌以禮贈葬各一節為照原任侍郎曾銑効忠被害枉抑已明節該本部題奉

欽依復職贈廢原坐贓銀相應備咨刑部轉行原籍官司免其追納及將監併家屬盡行釋放以恤無辜其原任南京兵部尚書後閣住王軌律已居官不聞訾議雖以小過獲罪似無損其平生相應復其原職仍咨禮部議給卹典臣等不敢定擬隆慶元年九月初八

日題奉

聖旨是王軌准復原職欽此

覆監察御史孫代劾少卿胡汝桂聽勘疏

題為奸愷銓郎冒陞卿秩懇乞

聖明俯賜罷斥以清仕路事考功清吏司案呈奉本部送吏科抄出江西道監察御史孫代題奉

聖旨吏部知道欽此欽遵抄出送司案呈到部看得江西道監察御史孫代論劾原任文選司郎中今陞提督四夷館太常寺少卿胡汝桂險狠之心貪邪之性任類文役僕以納賄趨聞人要津以延舉密布籠蓋之

之計深藏陷穿之機又濫銓曹已竊名位復叨卿寺
愈覺負乘乞要特賜罷斥一節為照本部推陞銓曹
皆臣等堂官親為裁決郎中胡汝桂職任承行典選
以來不聞別議頃者大猷已完例該敘遷乃今御
孫代極口論列大率言其心術奸回計慮險詐為人
則實而懸羊陷人則八面埋伏若果是實豈容不
堯舜之世但中間所列事情俱在原籍臣等難以懸斷合
候

命下行令胡汝桂回籍聽勘遺下少卿員缺照例先行推
補隆慶元年九月十四日題奉

聖旨是胡汝桂着回籍聽勘欽此

議原任吏部尚書周用廕叙疏

題為懇乞

天恩比例錄廕以圖補報事驗封清吏司案呈奉本部送
吏科抄出原任太子少保吏部尚書周用嫡孫周賚
奏奉

聖旨吏部知道欽此欽遵抄出送司查得先年本部尚書
耿裕倪岳馬文升身後俱嘗廕一子做中書舍人近
年本部尚書聞淵男聞思學奏稱伊父致仕在家病
故乞要比例錄廕該本部覆題奉

世宗皇帝聖旨聞淵庵一子做中書舍人欽此俱欽遵外
 今該前因通查案呈到部看得原任太子少保吏部
 尚書周用嫡孫聽用監生周賚奏稱伊祖在任病故
 乞要比例錄廕中書舍人一節為照本官宅心謹畏
 持已方嚴總憲度而茂振風裁掌銓曹而殫竭心力
 真懷夙夜匪懈之誠竟成鞠躬盡瘁之志所據錄廕
 既經該司查有尚書耿裕聞淵等事例相應題

請但

恩命出自

朝廷臣等未敢擅便隆慶元年九月三十日題奉

聖旨是周用着廕一子入監讀書欽此

覆都給事中王治等劾尚書郭乾等去留疏

題為摘議有罪督撫大臣以振中興紀綱以厲防邊實

政事考功清吏司案呈奉本部送吏科抄出吏科等

科都給事中王治歐陽一敬等題奉

聖旨吏部知道欽此欽遵抄送司案呈到部看得吏兵

二科都給事中王治歐陽一敬等交章論劾山西薊

鎮失事官員疏內要將兵部尚書郭乾左侍郎遲鳳

翔致仕調用又浙江道御史凌備等舉刺人才亦劾

尚書郭乾調用并及巡撫江西等處地方兵部右侍

郎兼都察院右僉都御史任士憑撫治鄖陽都察院
右僉都御史劉秉仁俱罷斥各一節除總督等官劉
燾等奉

旨查勘兵部右侍郎吳桂芳到任未久難以議罰外為照
尚書郭乾守已清嚴並官鎮密邊關諸務雖由本兵
調度居中制外遙度實難但本官見以患病乞歸臣
等又親見其形容消瘦精神衰減似應令其回籍調
理痊可之日另行擬用侍郎遲鳳翔久歷邊陲素稱
清謹頃者奉

命經略不聞人有建明委難辭責即今駐劄昌平奉

敕防禦且年才六十以上止聞其母有病不聞本官有疾

虜營未遠南山喫緊全在此月臨敵易將兵家所忌
似應降俸三級令其用心幹理以圖後效巡撫江西
右侍郎任士憑厚重端謹而民情少諧坐鎮江藩之
大省殊非所宜撫治鄖陽右僉都御史劉秉仁年壯
才優而兵略未聞立視南陽之巨寇全無多算似應
俱調南京衙門以全器使之義遺下兵部尚書江西
鄭陽二巡撫員缺照例速行推補但大臣去留出自
朝廷臣等未敢定擬隆慶元年十月初三日題奉

聖旨是郭乾既有疾准回籍調理遲鳳翔降俸三級照舊

供職任士憑劉秉仁依擬調用欽此

覆監察御史凌儒等會薦都御史陳其學等起用

疏

題為舉刺人才以備邊防以安內地以紓

聖懷事文選清吏司案呈奉本部送吏科抄出河南等道

掌道事浙江道監察御史凌儒等題奉

聖旨吏部知道欽此欽遵抄出送司查得巡撫朱笈係在

軍赦回王輪係冠帶閑住總督陳其學係回籍聽勘

巡撫戴才汪道昆侍郎喻時俱係聽候別用其吳嘉

會先係為民隆慶元年四月該科道等官張鹵陳聯

芳等會薦該本部覆題奉

欽依吳嘉會罷欽此通查案呈到部看得河南等道掌道

事浙江道監察御史凌儒等題稱原任三邊總督等

官陳其學等七員俱堪邊防錄用一節無非以邊陲

多事督撫乏人廣搜博采人惟求舊之意除吳嘉會

已經奉

旨報罷汪道昆戴才喻時俱原係聽用人員難以再議外

所據總督陳其學巡撫朱笈王輪三員既該十三道

官會舉前來相應起用合候

命下將陳其學等遇有相應員缺酌量推用及照天生人

才自足一世之用但才有短長當取長而舍短事有新舊當舍舊而圖新卽今前項所舉諸臣或身被重劾而未經消除或失事重大而未曾勘結取其一生之槩薦之固爲無忝摘其一時之失劾之則亦無詞此處方薦起而彼處卽劾之彼處方薦之而此處卽劾之以致未出者憂彈畏譏不肯彈冠已出者惜名保節急欲掛冠均非

聖朝之所宜有合無今後言官薦到起用者必須到任一年之後果無成效或奉職無狀在京者聽科道官糾正在南京者聽南京科道官糾正在外者聽各該撫按官糾正不止褫奪其官仍行治罪庶幾目見此之耳聞更直責實比之循名尤當不惟

國體人才可以兩全臣等不明之咎亦可以少追矣隆慶元年十月初七日題奉

聖旨是陳其學朱笈王輪准起用欽此

會議監察御史李叔和劾總督劉壽等留用疏

題爲邊臣失策虜患可憂議處重鎮督帥及本兵司官預圖內外安攘事吏科抄出陝西道監察御史李叔和題奉

聖旨吏兵二部看了來說欽此欽遵抄出到部看得陝西

道監察御史李叔和欲將譚綸代劉燾總督戚繼光代李世忠總兵申維岳等拿究何源調用一節除兵部侍郎譚綸近奉

欽依專管練兵總兵李世忠申維岳又該兵科別本論劾兵部徑自議覆外臣等會同兵部右侍郎臣吳桂芳議得總督部御史劉燾素著才名頗閒兵略頃者地方失事重大言官論列責實難辭但總督巡撫盡地分守原有成議虜入界嶺等口係是巡撫原分地方且督撫見奏捷音奉有

明旨行巡按御史查勘功罪未明似難輕擬合無將劉燾容令策勵經理稍候勘回之日另行議奏

定奪總兵戚繼光與侍郎譚綸本同一事譚綸既已回京合無將戚繼光一體取回共修戎政遺下福建總兵員缺兵部先行推補職方司郎中何源年力方壯才識亦優況部中推選將領俱係臣等堂官定擬難以盡責本官合無將何源行令照舊供職以圖後效隆慶元年十月十二日題奉

聖旨是劉燾着策勵供職候勘明奏請戚繼光着取回京何源准留用欽此

請撰述新建伯土守仁等贈謚 詔命疏

題爲

開讀事驗封清吏司案呈節該本部題准禮部咨該禮科
等科都給事中等官辛自修等浙江等道掌道事河
南道監察御史王好問等題稱原任新建伯南京兵
部尚書兼都察院左都御史王守仁少傅兼太子太
傅戶部尚書謹身殿大學士蔣冕太子太保吏部尚
書武英殿大學士石珪少保兼太子太保吏部尚書
喬宇禮部尚書汪俊刑部尚書喻茂堅南京兵部尚
書湛若水南京禮部右侍郎呂柟南京刑部右侍郎
周廣詹事府少詹事兼翰林院侍讀學士黃佐都察

院右僉都御史王雲鳳各贈官緣由又該原任太子
少保戶部尚書王杲男王世泰原任都察院右僉都
御史朱方男朱繪各奏要復父原職已經本部題奉
欽依俱准復職訖及查得新建伯該贈新建侯少傅該贈
少師少保該贈少傅太子太保該贈少保太子少保
該贈太子太保尚書該贈太子少保禮部侍郎該贈
禮部尚書刑部侍郎該贈都察院右都御史少詹事
該贈禮部右侍郎右僉都御史該贈右副都御史通
查案呈到部看得新建伯王守仁等生著勳庸效垂
令譽或輸忠仗義以定危疑或亮采分猷以贊治化

博雅者資其黼黻之光剛正者賴其匡持之力職守不同人品則一既經言官會舉前來相應褒錄合無俯念舊臣特從追贈以示

清朝旌賢勸善之典等因隆慶元年五月二十日題奉聖旨王守仁准贈新建侯蔣冕少師喬宇少傅石瑄少保王杲太子太保汪俊喻茂堅湛若水俱太子少保呂柟禮部尚書周廣都察院右都御史黃佐禮部右侍郎王雲鳳朱方俱右副都御史欽此又該本部題同前事內開看得大學士等官楊廷和等或懋德弘猷夙崇海宇或豐功偉節雅重

朝端迺其履歷之詳均為方正之士先該本部題

請得復原官後該禮部同刑部尚書林俊南京工部尚書吳廷舉查明題

准得與祭葬所據贈官一節相應題

請計開原任少師兼太子太師吏部尚書華蓋殿大學士楊廷和擬贈太保太子太保兵部尚書兼都察院左都御史王廷相太子太保兵部尚書聶豹俱擬贈少保太子少保戶部尚書梁材擬贈太子太保兵部尚書兼右副都御史翟鵬刑部尚書劉劄林俊南京工部尚書吳廷舉俱擬贈太子少保兵部左侍郎張漢

兵部右侍郎兼右副都御史曾銑揚守謙兵部右侍郎兼右僉都御史商大節俱擬贈兵部尚書南京工部左侍郎程文德擬贈禮部尚書工部右侍郎江曉擬贈工部尚書都察院右副都御史孫繼魯擬贈兵部左侍郎南京國子監祭酒鄒守益擬贈禮部右侍郎等因隆慶元年七月初四日題奉

聖旨楊廷和等贈官依擬翟鵬原以失事被逮罷欽此又該本部題爲獻愚忠以禪

新政事准禮部咨送該吏科左給事中陳瓚題該本部看得原任太子太保兵部尚書彭澤南京工部左侍郎

何孟春官常人品禮部揚確已明在彭澤則天下稱爲名卿在何孟春則天下稱爲名士委當厚加

褒錄以示優崇所據贈官相應題

請計開原任太子太保兵部尚書彭澤擬贈少保南京工部左侍郎何孟春擬贈禮部尚書隆慶元年七月二十九日題奉

聖旨彭澤准贈少保何孟春禮部尚書欽此續准禮部咨該翰林院題出揭帖

賜原任新建伯王守仁謚文成大學士楊廷和謚文忠蔣冕謚文定石瑤謚文介吏部尚書喬宇謚莊簡熊浹

謚恭肅兵部尚書王廷相謚肅敏聶豹謚貞襄彭澤
謚襄毅戶部尚書梁材謚端肅禮部尚書汪俊謚文
莊刑部尚書林俊謚貞肅南京工部尚書吳廷舉謚
清惠刑部左侍郎劉孟謚端毅南京工部左侍郎
孟春謚文簡南京禮部右侍郎呂柟謚文簡兵部右
侍郎曾鈺謚襄愍楊守謙謚恪愍商大節謚端愍右
副都御史孫繼魯謚清愍太僕寺卿楊最謚忠愍
京國子監祭酒鄒守益謚文莊兵部員外郎楊傑謚
謚忠愍左春坊左春少詹羅洪先謚文恭各咨開前案
案呈到部看得尚書熊浹卿楊最員外郎楊傑成德
善羅洪先各贈官

誥命先該本部題請通行撰寫所有今

賜謚號合行翰林院查與贈官文軸一併撰寫其新建侯
王守仁等贈謚官員例應給與

誥命欲行翰林院撰文中書舍人關軸書寫臣等未敢擅
便隆慶元年十月二十一日題奉

聖旨是欽此

計開

原任新建伯南京兵部尚書兼都察院左都御史王
守仁今贈新建侯謚文成

原任少師兼太子太師吏部尚書華蓋殿大學士楊廷和今贈太保謚文忠

原任少傅兼太子太傅戶部尚書謹身殿大學士孫冕今贈少師謚文定

原任太子太保吏部尚書兼武英殿大學士后瑄今贈少保謚文介

原任少保兼太子太保吏部尚書喬宇今贈少傅謚莊簡

原任太子太保兵部尚書兼都察院左都御史王廷相今贈少保謚肅敏

原任太子太保兵部尚書聶豹今贈少保謚貞武

原任太子太保兵部尚書彭澤今贈少保謚襄毅

原任太子少保戶部尚書梁材今贈太子太保謚端

肅

原任太子少保戶部尚書王梟今贈太子太保

原任禮部尚書汪俊今贈太子少保謚文莊

原任刑部尚書林俊今贈太子少保謚貞肅

原任刑部尚書喻茂堅今贈太子少保

原任刑部尚書劉訥今贈太子少保

原任南京工部尚書吳廷舉今贈太子少保謚清惠

原任南京兵部尚書湛若水今贈太子少保

原任兵部左侍郎張漢今贈兵部尚書

原任刑部左侍郎劉玉今贈刑部尚書謚端毅

原任南京工部左侍郎程文德今贈禮部尚書

原任南京工部左侍郎何孟春今贈禮部尚書謚文

簡

原任南京禮部右侍郎呂柟今贈禮部尚書謚文簡

原任兵部右侍郎兼都察院右副都御史曾銑今贈

兵部尚書謚襄愍

原任兵部右侍郎兼都察院右副都御史楊守謙今

贈兵部尚書謚恪愍

原任兵部右侍郎兼都察院右僉都御史商大節今

贈兵部尚書謚端愍

原任南京刑部右侍郎周廣今贈都察院右都御史

原任工部右侍郎江曉今贈工部尚書

原任都察院右副都御史孫繼魯今贈兵部左侍郎

謚清愍

原任詹事府少詹事兼翰林院侍讀學士黃佐今贈

禮部右侍郎

原任都察院右僉都御史王雲鳳今贈都察院右副

都御史

原任都察院右僉都御史朱方今贈都察院右副都御史

原任南京國子監祭酒鄒守益今贈禮部右侍郎謚文莊

議原任吏部侍郎董玘等贈官復職疏

題為

開讀事驗封清吏司案呈奉本部送准禮部咨該總督浙直江西軍務巡撫浙江地方兵部右侍郎兼都察院右僉都御史劉畿題奉

聖旨該部知道欽此欽遵該本部查得吏部左侍郎兼翰林院學士董玘學冠詞林行乎上論始觸權璫而其心見斥繼蒙收錄而秉志益堅同官故牘之焚意在掩瑕竟以抗言而得止闈寺東郊之送至傾朝重復能獨立而不行乃若修

兩朝之實錄則編摩獨擅於當年掌鄉會之文衡則登選尚稱於今日祇因佐銓卿貳而不通請謁乃致見擠同儕而巧構謗誣然于本官身心素履略不可訾所當念其纂修

國史及

經筵日講之功重加卹典以示優厚者也御史黎貫其外郎張潔行人薛侃編修王相或以抗言而危身或以忤勢而被遣均為忠義之臣應霑

卹錄之典俱應咨行吏部議復原官各加優贈等因覆奉欽依備咨到部送司查得吏部侍郎兼翰林院學士禮部尚書案呈到部看得原任吏部左侍郎兼翰林院學士董玘原任陝西道監察御史黎貫禮部員外郎張潔行人司行人薛侃翰林院編修王相已經撫按官極口揚確又經禮部虛心詳議悉與臣等所請相同相應題

請合無將董玘照例贈官黎貫等先行各復原職其贈官另行題

請臣等未敢定擬隆慶元年十月二十六日題奉聖旨是欽此

奉 詔條陳邊計疏

題為欽奉

聖諭條陳邊計事准兵部咨該

內閣傳奉

聖諭朕看得東西二鎮虜寇搶殺至甚防虜之計如何預處卿等會文武羣臣着實詳議來看欽此欽遵節該本

蒲城楊大年原籍
卷四
部覆議合再通行大小官員摠忠殫慮破格講求各
令刻期具奏容臣等酌量緩急會同

內閣并五府九卿科道各官逐一詳議列款上請取自
聖裁等因題奉

欽依備咨前來臣等竊惟狂胡匪茹分道憑陵東犯薊鎮
則

九重震驚西犯偏關則三晉騷動搶殺至甚誠如

聖諭荷蒙

皇上軫念生靈日勤宵旰特諭輔臣公同臣等詳議預防
之計臣等雖至愚極陋目擊時艱敢不祇承自昔防

虜不過戰守二端而各邊地勢不同戰守亦自互異
卽如薊州昌平保定三鎮有牆可恃虜難保其不來
但當乘高據險使之匹馬不入卽爲上策山西宣大
遼東四鎮無牆可恃虜難保其不入但當堅壁清野
使之一毫不得卽爲中策臣博臣本固臣士儋連日
面相酌議除重將權明軍令修城堡等項事宜已經
各官條奏不敢槩及外謹將東西六鎮戰守之機其
太且要者列款上陳伏望

聖明特賜省覽勅下該衙門會官詳議裁定施行及照奉
旨建白者臣等之事也詢謀叅酌者輔臣本兵之任也至

于削去虛文力求實效者則總督鎮巡兵備將領之責也若使臣等言之輔臣本兵議之邊臣不肯力任其事或明肆異同或陰行規避紙上空談譬之畫餅竟何益于安攘之效所據責成邊臣同心寅恭實心幹理乃今日之第一務也又念兵凶戰危人情所難朝廷所以驅策之者惟在賞罰有功不賞人固弗勸有罪不刑人孰肯輕蹈白刃之禍哉近歲薊鎮潘家口磨刀谷失守總督王忬楊選相繼棄市而總兵叅將遊擊反從未減是以今歲虜警屢稱敵戰竟無一將請纓而死可以見其情實矣頃蒙

宸斷速繫鎮巡人心始知警惕而副叅等官田世威劉實胥進忠吳光裕等分有信地不能固守其罪尤重亦當先行收問合無將田世威等提拿到京聽法司查照所犯一併擬罪以爲邊臣縱寇殃民者之戒臣等不勝懇切祈望之至隆慶元年十月二十九日題奉聖旨兵部集議來說欽此

計開

一定薊昌守牆之議薊昌二鎮因山爲牆延長幾二千里自庚戌虜變以來屢經修繕河坊口古北口黑谷關一片石等處拒回大虜明有徵驗近因猶虜潰

墻說者遂謂墻不可守是誠因噎而廢食也蓋前年
墻子嶺失守乃通州官軍今歲界嶺口失守乃河間
官軍守兵單弱援兵不至此調度之失宜豈可歸罪
于墻哉合無聽總督侍郎曹邦輔督同鎮巡等官
此冬閑躬履邊垣逐一閱視稍有不備卽爲修補春
秋兩防將調到入衛邊兵分管配搭每路各得一二
千名駐劄適中地方猝遇虜衆攻墻令其併力戰守
彼仰面而攻我乘高而擊虜騎雖強恐亦不能飛渡
一定宣府南山之議宣府東路咫尺昌平其四海右
岔道八達嶺等處俱有通賊要路總督軍門統領
兵拱護南山實以

陵京爲重連年關外增設墩墻深得重門待暴之義近議
紛紛欲將兵馬列於張家口左右衛等處俟其南下
方守南山失策其矣合無備行總督都御史王之誥
督同鎮巡等官今後春秋兩防仍照成議謹守南山
以慰
君父宵旰之懷不得藉口外防致貽內患

一定山西擺列之議鴈門寧武偏頭三關均爲山西
門戶鴈寧二關外有大同猶稱屏障偏頭一關西連
延綏獨當虜衝先年寧鴈一帶添築邊墻增兵戍守

未爲無據然邊長八百餘里原守官兵民壯不滿數萬名曰擺邊實爲故事固未見其倚牆拒守如薊昌二鎮真能遏虜之歸者也蓋薊昌合諸鎮之力爲守頗易山西止一鎮之力爲守實難今該給事中張齊議罷擺邊得之目擊非臆說者但事在關外遽難遙斷合無聽總督都御史王之誥督同鎮巡等官虛心酌議務求長便具實奏

聞如果可能每歲秋防官軍民壯止宜屯駐適中地方遇有虜警相機戰守以保萬全

一定保鎮防守之議紫荆倒馬龍泉諸關層峯疊嶂頗稱天險且籍官天爲之屏蔽虜若南犯諸關勢必經由二鎮即使介馬而馳亦須數日可到但當明其耳目養其銳氣如果虜犯宣大已入內邊南窺洪蔚保安靈丘廣昌等處然後乘墻拒守斯爲得策近年以來先期擺邊不惟空勞士馬亦且糜費芻餉合無聽總督侍郎曹邦輔督同鎮巡等官每遇春秋兩防預將兵馬分定地方照常操練必須的有警報方可登牆以成以逸待勞之計

一定大同搗巢之議大同地方外連朔漠與虜爲鄰虜犯山西保定勢必由之先年總兵官梁震每遇虜

入輒率勁兵出邊搗巢故終震之任虜卽入寇不敢
久駐蓋率于內顧耳合無備行總督都御史王之誥
督同鎮巡等官今後虜果深入發兵搗巢冬春虜賊
馬弱之時虜雖不犯我境間亦搗之亦不爲過有功
破格陞賞縱有敗衄不當輒加開邊啓釁之罪至于
宣府亦可做而行之蓋總兵官馬芳驍勇不減于震
戮力報國此其時也

一定遼東積貯之議遼東一鎮濱海鄰夷中通一線
之路一切兵食悉皆仰給本鎮之產且地甚肥饒
戒常稔但鎮人愚昧不肯少爲積蓄之計豐收之任

粒米狼戾一遭凶荒坐而待斃如嘉靖三十八年三
十九年人至相食食既不足兵自難振何以責其敵
愾之功合無備行巡撫都御史魏學曾督同守巡兵
備等官多方設法令其開墾荒蕪每遇年豐殺賤處
發官銀糴買收貯仍教諭民間照依江南規則各自
蓄積務爲一年三年之備惠而不費事在可行

覆都給事中歐陽一敬奏巡撫河南侍郎王國光
催促赴任疏

題爲仰遵

聖諭詳議督臣罪罰均法紀服輿情以裨防虜大計事考

功清吏司案呈奉本部送吏科抄出兵科都給事中
歐陽一敬等題奉

聖旨吏部知道欽此欽遵抄出送司案呈到部看得兵科
都給事中歐陽一敬等題稱山西地方失事要將總
督王之誥分別功罪定擬去留及論新改巡撫河南
戶部右侍郎兼都察院右僉都御史王國光病未痊
可別行推用各一節除王之誥已經奉

旨回籍聽勘外內王國光先該六科十三道官張鹵陳聯
芳等交章薦其奇抱清才沉疴已經本部題奉
欽依酌量推用頃因河南巡撫冀鍊員缺不候交代臣等

以本官原籍去河南止二百里且嘗任儀封知縣熟
知河南之事以故疏名上

請荷蒙簡用乃今兵科又論其衰病不堪查與會薦不同
遽難輕擬合無催行王國光作速前去到任管事如
果病未痊疴聽其徑自具奏以憑覆

請定奪隆慶元年十一月初三日題奉
聖旨是欽此

覆都給事中王治奏原任大學士夏言等復職疏
題為懇祈

聖明廣謚宥禁妄乞以昭勸懲事驗封清吏司案呈奉本

部送吏科抄出吏科都給事中王治等題奏

聖旨該部知道欽此欽遵抄送到司行准本部考功清吏司付開禮部右侍郎原任大理寺卿朱廷立嘉靖二十八年為糾劾奸濫卿貳以肅官階以愜公論事奉世宗皇帝聖旨閑住欽此刑部左侍郎詹瀚為奸污不職卿貳大臣乞

賜罷黜以肅官階以端士習事該本部覆奉

世宗皇帝聖旨着致仕去欽此欽遵通查案呈到部看得吏科都給事中王治等題稱欲將大學士夏言量為雪宥大理寺卿朱廷立刑部侍郎詹瀚追奪閑住致

仕各一節除朱廷立已經閑住無容別議外為照原任少師兼太子太師吏部尚書華蓋殿大學士夏言遭遇

先帝特達之知舉動乖違不能無罪但總督曾銑議復河套原係公事逆臣嚴嵩誣以交結近侍以致斷首并戮中外咸憤其寃卽今曾銑既蒙昭雪夏言之枉委當亟為申理原任刑部左侍郎詹瀚久受夏言之罪翼甘作嚴嵩之犬鷹既冒致仕之榮於生前宜加褫奪之罰於身後合無將夏言量復原職詹瀚追奪致仕止與閑住但

恩威出自

朝廷臣等未敢定擬隆慶元年十二月十四日題奉

聖旨夏言准復吏部尙書詹瀚原職着追奪欽此

欽奉 聖諭嚴革 覲臣私交疏

題為欽奉

聖諭事考功清吏司案呈奉本部送該

內閣傳奉

聖諭朕見今年朝覲官員來京

祖宗時不許各處營求欽此欽遵恭捧到部送司案呈到

部臣等莊誦

綸音仰見

陛下法

祖圖治慎重考課甚盛心也臣等職司其事曷勝慶忭竊

見邇來時政

清明在內諸司靡不守典奉法兢兢自持卽有營求之輩

亦自無所容力先該臣等具題今次部院考察備查

歷年考語兼採輿論從公去留敢有央求囑託者卽

係素無行檢之人定以不謹黜退已經奉有

欽依出榜禁約茲載上塵

宸衷下頒明諭臣等敬當嚴行申飭以警人心合候

命下通行五城巡城御史多差兵番密加緝訪果有前項
不肖官員仍肆營求及假稱部院官吏皂隸名色走
空索財者即便拿送部院併究受囑指引打點各犯
叅送法司比照選法誑騙事例枷號三個月俱發煙
瘴地面充軍六科十三道官如有見聞真確者各許
指名叅劾庶幾舊章克率新政維光臣等膚淺固陋
之罪亦可以少追於萬一矣隆慶元年十二月十六
日題奉

聖旨是考察重典但有營求的你每務要遵諭叅治科道
官有所見聞各卽指名劾奏欽此

覆都給事中王治條陳定等則以辨方面賢否疏
題爲陳三等以飭吏治以廣

德意事文選清吏司案呈奉本部送吏科抄出吏科都給
事中王治等題奉

聖旨吏部看了來說欽此欽遵抄出送司案呈到部看得
吏科都給事中王治等題稱定等則以辨賢才一事
欲要將方面有司定擬三等九則填列

進呈仍發式撫按以後照式填造著爲定例庶朝
覲可據以拔尤優遇激勸人心向後可據以超陞行取久
任敘陞各一節爲照人品不同大略有是三等誠如

該科所論但資稟本殊學問各異論其才有先未請
而後練達者論其守有始克廉而終貪肆者若止據
一時考詞即便填列等則進呈

御覽欲改圖者恐無自新之路後變節者反啓倖免之途
立法之初必須詳慎方免後艱合無聽本部備將各
處方面官照依撫按奏薦到部者不必分則酌量分
爲三等仍行來

朝兩司官將所屬官員不分來朝與未來朝亦酌量分爲
三等開送本部置立堂印文簿明白開寫送發該司
收貯此後查訪有先上而後中下者仍改上爲中下
有先中下而後上者仍改中下爲上不以一時一事
槩其平生凡遇陞遷行取時容臣等酌量前項次第
以次奏

請一面移咨都察院轉行各該撫按衙門今後造報賢否
文冊務要明開等第從實填註不止方面府正佐州
縣正官雖首領雜職有則一體填入無則缺之如或
任情徇私含糊顛倒悉聽臣等與該科指名叅究隆
慶元年十二月二十六日題奉

聖上目是欽此

覆左給事中孫枝等條陳久任協理文臣疏

題為摘陳營務以飭戎政事文選清吏司案呈奉本部
送兵科抄出巡視京營刑科左給事中孫枝等題奉
聖旨該部看了來說欽此欽遵抄出送司案呈到部看得
巡視京營刑科等科左給事中等官孫枝等條陳要
將協理戎政大臣久任一節為照協理戎政大臣責
任為重委當久任責成但邊方多事提兵之文缺甚
多將材難得知兵之文臣甚少東移西轉其勢不得
不然要之本非政體合無今後遇有前缺容臣等會
同在京三品以上堂上官悉心精選果得其人雖不
能定以年限亦須令其從容展布不得數為遷易徒

增煩擾隆慶二年正月十二日題奉

聖旨是欽此

議原任刑部尚書蔡雲程贈官疏

題為比例陳情懇乞

天恩賜給贈諡祭葬以光泉壤事驗封清吏司案呈奉本
部送准禮部咨送原任刑部尚書已故蔡雲程贈官
緣由到部送司查得嘉靖四十三年十二月內該原
任工部尚書劉麟妻王氏夫致仕在家病故乞要
比例贈官等因該本部覆奉

世宗皇帝聖旨劉麟贈太子少保欽此欽遵外今該前因

通查案呈到部看得原任刑部尚書蔡雲程孫男蔡
迎恩奏稱伊祖歷官前職丁憂服闋在家病故乞要
比例贈官一節為照本官性資閑雅操履端嚴長於
文華學憲有功於後進明於法比刑曹無媿於前修
所據贈官既經查與尚書劉麟事體相同似應題
請臣等未敢定擬隆慶二年正月十三日題奉
聖旨蔡雲程准贈太子少保欽此

覆監察御史王廷瞻論侍郎樊深致仕疏

題為衰庸大臣不堪法紀重任懇乞

聖明亟賜休致以全晚節事考功清吏司案呈奉本部送

吏科抄出巡按直隸監察御史王廷瞻題奉

聖旨吏部知道欽此欽遵抄出到部送司案呈到部有得
巡按直隸監察御史王廷瞻論劾刑部左侍郎樊深
年老欲要致仕一節為照侍郎樊深向在銀臺茂著
風裁至於彈劾逆鸞一疏尤為人所傳誦頃者蒙
恩起用擢貳秋卿雖赤心尚在報稱方殷而皓首相侵精
力漸減委當全其進退之義合候

命下行令本官以禮致仕隆慶二年正月十九日題奉
聖旨樊深准致仕欽此

議原任通政司叅議徐學詩贈官疏

題為懇乞

聖明俯卹忠直以勵臣工事驗封清吏司案呈奉本部送
准禮部咨送原任刑部郎中徐學詩贈官緣由到部
送司查得隆慶元年正月內該本部覆議得應該卹
典諸臣分別三等典刑者上也合當復其原職

特贈一官厚加

諭祭仍廢一子

廷杖而死者次也合當復其原職量贈一官亦廢一子
或久繫囹圄或遠戍邊徼或永棄草澤終得死於囹
下者又其次也合當復其原職仍贈一官又查得通

政使司叅議該贈中順大夫大理寺少卿今該前因
通查案呈到部看得提督軍務巡撫浙江等處地方
都察院右僉都御史趙孔昭題稱原任刑部郎中徐
學詩先以建言得罪奉

欽依起用陞南京通政使司右叅議在任病故乞要贈官
一節為照本官忠鯁之資端嚴之行遭際

聖明御極卽蒙收用比之身陷重辟賫志以歿者不同應
在原擬三等之數既經巡撫都御史趙孔昭具題前
來相應議擬合候

命下將徐學詩追贈大理寺少卿以慰忠魂臣等未敢定

擬隆慶二年正月二十七日題奉

聖旨徐學詩准贈大理寺少卿欽此

議原任巡撫大同都御史陳燿復職疏

題為比例懇乞

天恩垂卹屈抑以廣

聖澤事驗封清吏司案呈奉本部送准都察院咨據巡按直隸監察御史周詠呈會查得充軍已故原任巡撫大同都察院右僉都御史陳燿復職緣由到部送司案查先該陳燿男生員陳莊奏奉

聖旨吏部知道欽此欽遵已經查勘去後今該前因案呈到部看得巡按直隸監察御史周詠勘得原任巡撫大同都察院右僉都御史已故陳燿先年拏解充軍與總督郭宗臯委係一事一節為照總兵官張達不候大軍輕身出戰實出巡按御史胡宗憲之主持燿與總督侍郎郭宗臯原未與議既今宗臯既已復職且以南京兵部尚書致仕陳燿事同一體相應准復原職臣等未敢定擬隆慶二年正月二十七日題奉聖旨陳燿准復原職欽此

議大學士徐階一品六考 恩典疏

題為歷俸再滿九年自効奉職不稱乞

賜罷黜事考功清吏司案呈奉本部送吏科抄出少師兼太子太師吏部尚書建極殿大學士徐階奏奉

聖旨卿輔佐

先帝久著忠誠翊戴朕躬勳猷益茂茲九年再滿朕心嘉悅着照舊贖理不允辭應得恩典吏部議擬來看欽此欽遵抄出到司查得嘉靖四十四年四月初五日該司禮監官傳奉

世宗皇帝聖諭元輔階九年外又歷六年考滿着照舊贖贖贖等會議加恩來看欽此吏禮二部尚書嚴訥李春芳會議

賜敕賜宴加授特進給與應得

誥命仍贖一子爲尚寶司丞題奉

聖旨卿等所議恩加都可仍加上柱國以示朕特眷欽此隨該本官具疏辭免奉

聖旨卿忠誠公正念切邦民輔政多年勳猷茂著奏績加恩盛典不逾覽奏情詞懇切上柱國及部宴允辭照例給與折宴銀四十兩彩段四表裏其餘宜悉承命以副朕眷答忠勞至意該部知道欽此又查得嘉靖元年

先帝以大學士楊廷和有翊戴功進封伯爵仍贖一子爲錦衣衛指揮後因本官辭免伯爵又贖一子四品文

職嘉靖十八年大學士翟鑾以巡歷九邊廕一子做
錦衣衛見任千戶今該前因通查案呈到部臣等竊
惟三載考績三考黜陟自唐虞至今未之有改至於
一品再歷九年以十八年考滿者尤為

累朝希見之事今照少師兼太子太師吏部尚書建極
殿大學士徐階本以文武兼資之才幸逢

神聖迭興之會登第以來颺歷幾五十年自入

內閣允稱咸有一德中外之務皆至襄贊之猷悉皆立
辦於一時南北之警交馳籌運之略真能決勝於千
里輔佐

先帝已收求舊之功翊戴

聖皇益闡維新之政忠誠勳猷誠如

聖諭嘉靖四十四年一品十五年考滿荷蒙

先帝賜敕賜宴三代

誥命廕一子為尚寶司司丞又加特進又加上柱國于時
本官過為謙挹多就辭免即今再歷三年勞績愈懋
官級既無可加

誥命亦難重給所有

恩典似應酌處合無將徐階准支伯爵俸仍廕一武職其
應廕文銜加於伊男大常寺少卿徐璠

賜敕賜宴仍各照例舉行但係干

恩命臣等未敢定擬隆慶二年二月初八日題奉

聖旨是輔臣階特加支伯爵俸廕一子與做錦衣衛正千
戶其應廕文銜着以伊男徐藩陞太常寺卿仍管尚寶
司事還寫敕獎諭賜宴禮部以示朕眷禮至意欽此

蒲坂楊太宰獻納稿卷之四終